

Falaoa Falai faaFarani mo Tagata Uma



Saunia e Pollyanna Mattos Vecchio
(E faavae i se tala moni)

O lenei tala sa tupu i Pasila.

Sa uu e Repeka le lima o lona uso. Sa la feosofi ese mai le nofoa ma puna i luga o le kapeta. Sa ataata teineiti e toalua.

“Mauluga atu!” O le tala lea a Melisa.

“Tamaitai, aua le fepuna i totonu o le fale. Tatou te le mananao e faalavelave ia Miss Daisy i le amataga o le aso,” na valaau mai ai Tina mai le umukuka.

Sa faauu Repeka ma Melisa ma saofafai i lalo. Sa faatoa latou siitia atu lava i se fale fou. O Miss Daisy o le tuaoi sa nofo i lalo ifo o i latou.

“Ua e vaai ea ia Miss Daisy?” Sa fesili atu ai Melisa ia Repeka.

“Leai. Ae ou te fefe ia te ia. Sa ou faalogo e ita o ia i tamaiti,” o le tala lea a Repeka.

Sa matala lautele mata o Melisa. “Ae faapefea la tatou tu masani o le falaoa falai faaFarani?”

Toe o ni nai aso ona oo lea i le Po o le Vaeluaga o le Kerisimasi. O tu masani faaleaiga e sili ona fiafia i ai Repeka ma Melisa o le faia o falaoa falai faaFarani o se meai mama mo o latou tuaoi uma. O le tausaga lenei o le a faapitoa ona o le taimi muamua lea o le a latou faia ai i lo latou fale fou.

“Atonu e tatau ona ta faamisi le faitotoa o Miss Daisy,” o le tala lea a Repeka.

I le Po o le Vaeluaga o le Kerisimasi, sa ala ae teineiti ma le fiafia e fai le falaoa falai faaFarani.

Sa fesoasoani Repeka ia Tama e saeu fuamoā, susu, suka, ma le tinamoni. Sa lolō e Melisa le falaoa i totonu o le paluga fuamoā. Ona

latou kukaina lea o le falaoa. E lei leva, ae manogi lo latou fale atoa e pei o se tinamoni.

Mulimuli ane, sa latou tuuina le falaoa falai faaFarani i totonu o ato ma tusi igoa o o latou tuaoi i luga o ato taitasi.

Sa tapuni e Repeka le ato mulimuli. “Saunia!” o lana tala lea.

Sa faitauina e Tama ia ato ma siaki uma igoa. “Ou te le o vaai i se tasi mo Miss Daisy,” o lana tala lea.

Sa fetilofa’i Repeka ma Melisa i le tasi ma le isi.

“Ma te lei mananao e avatu se mea ia te ia,” o le tala lea a Repeka. “E ita o ia i tamaiti.”

Sa faauu tamā. “O la tatou tu masani o le faasoā atu lea i tuaoi uma. E te le manatu ea e tatau ona tatou faia se tasi mo Miss Daisy?”

Sa iloa e Repeka ma Melisa e sa’o Tama. Sa la toe faatumuina se ato se tasi ma tusi ai “Miss Daisy” i luga.

Sa latou aveina atu taga i tuaoi taitasi. Mulimuli ane, na latou oo mai i le faitotoa a Miss Daisy.

Ae faapefea pe afai na te le fiafia i le meai? Ae faapefea pe afai e ee atu o ia ia i latou?

Sa manava loloa i totonu teneiti. Ona tu’itu’i ai lea i le faitotoa.

“O ai lea?” O le fesili lea a Miss Daisy. Sa ia tatalaina le faitotoa ma tilotilo ifo ia i latou. Sa pupuu lona lauulu paepae. Sa lei foliga taufaafefe tele o ia.

Mo sina taimi, sa lei iloa e Repeka ma Melisa le tala e fai atu.

“O i matou o lou tuaoi i le falealuga,” o le tala lea a Repeka.

Sa uu atu e Melisa le ato. “Ua matou aumaia ni falaoa falai faaFarani mo oe. Manuia le Kerisimasi!”

“Oi, faafetai lava! Ou te fiafia i le falaoa falai faaFarani.” Sa ave e Miss Daisy le ato. “O outou la o o’u tuaoi fou? Sa ou fia feiloai ia te outou, ae sa ou manatu atonu tou te le fiafia i tagata matutua e pei o a’u.”

Sa tilotilo atu Repeka ma Melisa i le tasi ma le isi ma ni mata lautele. “Sa matou manatu e te le fiafia i ni tamaiti!” Na fai atu ai Repeka.

Sa ata Miss Daisy. “Ou te alofa tele i tamaiti! Omai i totonu. O le a ou faaali atu ia te oe ata o fanau a la’u fanau.”

Sa latou o uma i totonu o le fale o Miss Daisy. Sa i ai fugalaau i soo se mea ma le tele o ata o aiga.

“Saofai i se nofoa. Sa ou faia nei lava se vai pasio,” o le tala lea a Miss Daisy. Sa ia liligi atu le vaiinu i ipu. “Ou te manatu

o le a matuai tofolele faatasi ma le falaoa falai faaFarani manaia lenei.”

Sa ave e teineiti ma o la matua ipu vaiinu. O le matuai tofolele lava!

Sa latou aaoina igoa o fanau a fanau a Miss Daisy. Sa latou faalogologo foi faatasi ma ia i musika o le Kerisimasi.

Sa sese Repeka ma Melisa e uiga ia Miss Daisy. O se tagata lelei tele o ia. Ma malie foi! O le falaoa falai faaFarani o le Kerisimasi o se tu masani maoae. O le tausaga lenei, sa fesoasoani ia i laua e faia ai se uo fou. ●



ATA NA TUSIA E SHAWNIAJ. C. TENNEY

Sa na o sina auaunaga laititi o le Kerisimasi na fesoasoani ia i latou e faia ai se uo fou.